



QENDRA KAVALJON

TERMA REFERENCE

PËR SHËRBIMIN E DIZAJNIT GRAFIK, MENAXHIMIT TË FUSHATËS DIGJITALE DHE PROMOVIMIT NË RRJETET SOCIALE

Projekti: “Kavaja 365 Experience”

Organizata zbatuese: Qendra Kavaljon

Institucioni financues: Bashkia Kavajë

Zona e zbatimit: Territori i Bashkisë Kavajë dhe kanalet digjitale të projektit

Kohëzgjatja e projektit: 5 muaj

Vlera e parashikuar për shërbimin: 250,000 lekë

1. SFONDI DHE KONTEKSTI

Qendra Kavaljon zbaton projektin “Kavaja 365 Experience”, të financuar nga Bashkia Kavajë, me kohëzgjatje 5 muaj. Projekti synon të promovojë territorin e Bashkisë Kavajë si një destinacion turistik aktiv dhe tërheqës gjatë gjithë vitit, duke evidentuar pasuritë natyrore, kulturore, historike, bregdetare, traditat lokale dhe ofertën e aktorëve të ekonomisë vendase.

Në kuadër të projektit parashikohen 5 vizita në terren, 3 guida turistike dhe eksploruese, promovimi i artizanëve, prodhuesve dhe bizneseve lokale, prodhimi i materialeve informuese dhe promovuese, si dhe aktiviteti përmbyllës “Kavaja 365 Experience”. Projekti synon të arrijë të paktën 10,000 persona përmes rrjeteve sociale dhe kanaleve të tjera të komunikimit dhe të prodhojë të paktën 20 materiale promovuese digjitale.

Për të garantuar një komunikim të unifikuar, profesional dhe të vazhdueshëm gjatë gjithë periudhës së zbatimit, Qendra Kavaljon do të kontrakttojë një ofrues të specializuar për dizajn grafik, administrimin e fushatës digjitale dhe promovimin në rrjetet sociale.

2. OBJEKTI I SHËRBIMIT

Objekti i kontratës është: “Shërbim për dizajn grafik, menaxhim të fushatës digjitale dhe promovim në rrjetet sociale në kuadër të projektit ‘Kavaja 365 Experience’”.

Shërbimi përfshin konceptimin dhe zbatimin grafik të komunikimit të projektit, planifikimin e përmbajtjes, përgatitjen dhe përshtatjen e materialeve digjitale, administrimin e publikimeve, promovimin e destinacioneve dhe aktorëve lokalë, si dhe monitorimin e rezultateve të fushatës.

3. QËLLIMI I SHËRBIMIT

Qëllimi i shërbimit është krijimi dhe administrimi i një komunikimi digjital të qëndrueshëm dhe profesional për projektin “Kavaja 365 Experience”, me synim rritjen e vizibilitetit të atraksioneve, aktiviteteve dhe aktorëve lokalë të turizmit. Shërbimi duhet të kontribuojë në:

- a) promovimin e Kavajës si destinacion turistik gjatë gjithë vitit;
- b) krijimin e një paraqitjeje grafike të njëtrajtshme dhe të dallueshme për komunikimin e projektit;
- c) promovimin e atraksioneve natyrore, historike, kulturore, bregdetare dhe rurale;
- d) promovimin e guidave, vizitave në terren dhe aktivitetit përmbyllës;

- e) rritjen e vizibilitetit të artizanëve, prodhuesve, bizneseve familjare dhe ofruesve lokalë të shërbimeve;
- f) arritjen e të paktën 10,000 personave përmes rrjeteve sociale dhe kanaleve të tjera të komunikimit të projektit dhe partnerëve.

4. KANALET DHE FUSHA E KOMUNIKIMIT

Shërbimi do të realizohet kryesisht në kanalet digjitale të Qendrës Kavaljon dhe në kanale të tjera që do të përdoren për komunikimin e projektit. Kur është e mundur, materialet mund të shpërndahen ose ripublikohen edhe nga Bashkia Kavajë dhe partnerët e projektit. Ofruesi do të përshtatë përmbajtjen sipas formatit dhe karakteristikave të platformës ku do të publikohet.

Fushata duhet të mbulojë komunikimin e projektit nga faza e fillimit deri në përfundim, duke përfshirë prezantimin e projektit, atraksionet, vizitat në terren, guidat turistike, artizanët dhe bizneset lokale, materialet informuese dhe aktivitetin përmyllës.

5. PËRSHKRIMI I SHËRBIMEVE TË KËRKUARA

5.1 Koncepti grafik dhe identiteti i komunikimit

Ofruesi do të propozojë dhe zbatojë një linjë grafike të unifikuar për komunikimin e projektit “Kavaja 365 Experience”. Kjo duhet të sigurojë koherencë vizuale në postimet, njoftimet, materialet informuese dhe formatet e tjera të komunikimit, duke respektuar logot dhe elementet institucionale që do t’i vihen në dispozicion nga Qendra Kavaljon.

5.2 Planifikimi i përmbajtjes dhe kalendari i komunikimit

Në koordinim me Qendrën Kavaljon, ofruesi do të përgatisë planin e komunikimit dhe kalendarin e publikimeve në përputhje me kalendarin e aktiviteteve të projektit. Përmbajtja duhet të planifikohet në mënyrë që të ketë komunikim përpara, gjatë dhe pas aktiviteteve kryesore, kur kjo është e përshtatshme.

5.3 Dizajni dhe përgatitja e materialeve digjitale

Ofruesi do të realizojë dizajnin dhe përgatitjen e materialeve promovuese digjitale të projektit. Në zbatim të treguesve të miratuar, duhet të përgatiten dhe publikohen të paktën 20 materiale promovuese digjitale, të cilat mund të përfshijnë postime grafike, karusele, materiale informuese, histori vizuale, përshtatje të fotografive dhe videove, njoftime për aktivitete dhe përshkrime të destinacioneve.

Materialet fotografike dhe filmike bazë do të sigurohen nga Qendra Kavaljon dhe/ose nga ofruesi i kontraktuar veçmas për fotografim dhe filmim. Ky shërbim nuk përfshin realizimin primar të xhirimeve profesionale foto/video, por përfshin përzgjedhjen, përshtatjen grafike dhe formatimin e tyre për komunikim digjital.

5.4 Administrimi i fushatës digjitale dhe publikimeve

Ofruesi do të asistojë Qendrën Kavaljon në administrimin e fushatës digjitale, duke përgatitur materialet për publikim, tekstet shoqëruese, formatet e përshtatshme dhe planifikimin e shpërndarjes. Publikimet duhet të jenë në përputhje me mesazhet dhe objektivat e projektit dhe të ruajnë një standard të njëtrajtshëm komunikimi.

5.5 Promovimi i atraksioneve dhe eksperiencave turistike

Përmbajtja e fushatës duhet të evidentojë atraksionet e dokumentuara nga projekti, guidat dhe itineraret e testuara, zonat bregdetare e rurale, trashëgiminë kulturore dhe historike, natyrën, gastronominë dhe elementet e tjera që përbëjnë ofertën turistike të territorit. Projekti synon dokumentimin e të paktën 15 atraksioneve, të cilat do të shërbejnë si një nga bazat e përmbajtjes promovuese.

5.6 Promovimi i artizanëve, prodhuesve dhe bizneseve lokale

Ofruesi do të përgatisë materiale komunikimi për artizanët, prodhuesit, bizneset familjare dhe ofruesit e shërbimeve të përzgjedhura nga projekti. Përmbajtja duhet të paraqesë në mënyrë të qartë produktin, shërbimin, traditën ose lidhjen e subjektit me territorin. Në përputhje me treguesit e projektit, duhet të promovohen të paktën 10 subjekte lokale.

5.7 Përgatitja grafike e materialeve për përdorim fizik

Kur kërkohet nga Qendra Kavaljon, ofruesi do të përshtatë dhe përgatisë në format të gatshëm për printim elementet grafike të guidave, broshurave, posterave, banerave ose materialeve të tjera promovuese. Ky shërbim përfshin vetëm përgatitjen grafike dhe skedarët finalë për printim; prodhimi fizik dhe printimi i materialeve janë objekt i një zëri të veçantë të projektit.

5.8 Promovimi i sponsorizuar dhe administrimi i buxhetit të platformave

Nëse për arritjen e objektivave të fushatës përdoret promovim i sponsorizuar në platformat digjitale, ai duhet të kryhet vetëm me miratim paraprak të Qendrës Kavaljon. Çdo kosto e tillë duhet të përfshihet brenda vlerës së kontratës, të jetë e gjurmueshme dhe të dokumentohet në raportimin e fushatës. Nuk parashikohet fond shtesë jashtë vlerës së kësaj kontrate për promovimin e sponsorizuar.

5.9 Monitorimi dhe analiza e performancës

Ofruesi do të monitorojë performancën e përmbajtjes dhe të fushatës, duke ndjekur të dhënat e disponueshme nga platformat, si arritja e publikimeve, shikimet, ndërveprimet dhe tregues të tjerë relevantë. Bazuar në rezultatet, mënyra e komunikimit mund të përshtatet gjatë zbatimit për të rritur efektivitetin e fushatës.

6. PRODUKTET MINIMALE TË DORËZUESHME

Për ta bërë shërbimin të matshëm dhe të verifikueshëm gjatë pranimit, kërkohen minimalisht produktet e mëposhtme, të cilat operacionalizojnë aktivitetet dhe treguesit e miratuar të projektit:

- a) një plan fillestar komunikimi dhe kalendar i publikimeve, i harmonizuar me kalendarin e projektit;
- b) një linjë grafike e unifikuar dhe modele bazë për komunikimin e projektit;
- c) të paktën 20 materiale promovuese digjitale të përgatitura dhe të publikuara gjatë periudhës së projektit;
- d) materiale komunikimi që mbulojnë vizitat në terren, 3 guidat turistike dhe aktivitetin përmbyllës;
- e) materiale promovuese për të paktën 15 atraksione të evidentuara nga projekti, sipas materialeve dhe informacionit të vënë në dispozicion;
- f) materiale promovuese për të paktën 10 artizanë, prodhues, biznese familjare ose ofrues lokalë të përzgjedhur nga projekti;
- g) përshtatje grafike dhe formate të nevojshme për përdorim në rrjetet sociale dhe, kur kërkohet, skedarë të gatshëm për printim;
- h) monitorim të fushatës me objektiv arritjen kumulative të të paktën 10,000 personave në rrjetet sociale dhe kanalet e tjera të komunikimit;
- i) raporte periodike të shkurtër mbi ecurinë e fushatës dhe një raport përfundimtar me statistikën kryesore;
- j) dorëzimin e skedarëve finalë dhe, kur janë krijuar posaçërisht për projektin, skedarëve të redaktueshëm të dizajnit.

7. KËRKESAT TEKNIKE DHE TË CILËSISË

Materialet grafike dhe digjitale duhet të jenë profesionale, të lexueshme, të përshtatshme për publikim dhe të ruajnë koherencën e identitetit të projektit. Kërkohet që:

- a) dizajnet të përshtaten me formatet e platformave ku do të publikohen;
- b) tekstet dhe elementet grafike të jenë të qarta, të lexueshme dhe pa gabime teknike;

- c) të përdoren vetëm fotografi, video, elemente grafike, fonte dhe materiale për të cilat ekziston e drejta e përdorimit;
- d) materialet të mos përmbajnë watermark ose elemente tregtare të ofruesit, përveç rasteve të miratuara nga Qendra Kavaljon;
- e) skedarët për printim, kur kërkohen, të dorëzohen në format dhe cilësi të përshtatshme për prodhim profesional;
- f) të ruhet një kopje rezervë e materialeve deri në pranimin përfundimtar të shërbimit.

8. KOORDINIMI DHE KALENDARI I PUNËS

Ofruesi do të punojë në koordinim të vazhdueshëm me Qendrën Kavaljon. Datat e publikimeve, prioritetet e komunikimit dhe materialet që do të përdoren do të harmonizohen me kalendarin e aktiviteteve dhe me materialet foto/video që prodhohen gjatë projektit.

Pikat kryesore të kontaktit nga projekti janë:

- a) Bora Ristani – Drejtori Ekzekutiv / Drejtuese e projektit;
- b) Geron Garuja – Koordinator i projektit;
- c) Andi Shedula – Ekspert i turizmit.

Ofruesi duhet të respektojë afatet e dakordësuara për materialet që lidhen me aktivitete me datë të përcaktuar dhe të njoftojë menjëherë për çdo rrethanë që mund të ndikojë në realizimin e shërbimit.

9. KOHËZGJATJA E SHËRBIMIT

Shërbimi do të realizohet gjatë periudhës së zbatimit të projektit “Kavaja 365 Experience”, me kohëzgjatje 5 muaj. Dizajni dhe fushata digjitale janë parashikuar të zhvillohen gjatë gjithë periudhës së projektit, ndërsa intensiteti i publikimeve do të përshtatet me kalendarin e aktiviteteve.

10. KËRKESAT MINIMALE PËR OFRUESIN

Ofruesi duhet të ketë kapacitet profesional dhe teknik për realizimin e objektit të kontratës. Në dokumentacionin e ofertës duhet të paraqesë të paktën:

- a) dokument identifikimi dhe/ose dokumentacionin e regjistrimit të subjektit, sipas statusit juridik të ofruesit;
- b) përshkrim të shkurtër të eksperiencës në dizajn grafik, komunikim digjital, menaxhim të rrjeteve sociale ose fusha të ngjashme;
- c) portfolio ose lidhje elektronike me punë të mëparshme relevante;
- d) përshkrim të mjeteve dhe programeve profesionale që do të përdoren për realizimin e shërbimit;
- e) propozim të shkurtër metodologjik për organizimin e komunikimit, përgatitjen e materialeve dhe monitorimin e rezultateve;
- f) ofertën financiare për realizimin e plotë të shërbimit.
- g) Eksperienca në promovim turistik, promovim territorial, projekte kulturore, aktivitete publike ose komunikim për institucione dhe organizata do të konsiderohet relevante për natyrën e shërbimit.

11. TË DREJTAT E AUTORIT DHE PRONËSIA MBI MATERIALET

Të gjitha dizajnet, formatet grafike, tekstet dhe materialet e krijuara posaçërisht në kuadër të kësaj kontrate do t’i dorëzohen Qendrës Kavaljon. Ofruesi duhet të garantojë se përmbajtja e krijuar prej tij dhe elementet që përdor mund të përdoren ligjërisht në kuadër të projektit.

Qendrës Kavaljon do t’i jepet e drejta për përdorimin, publikimin, ripublikimin, riprodhimin, përshtatjen, përditësimin dhe shpërndarjen e materialeve të realizuara në kuadër të projektit. Kur përdoren materiale foto/video të siguruara nga Qendra Kavaljon, ofruesi do t’i përdorë vetëm për qëllimet e kësaj kontrate dhe nuk do t’ua kalojë palëve të treta pa autorizim.

12. MONITORIMI, DORËZIMI DHE PRANIMI I SHËRBIMIT

Shërbimi do të monitorohet nga Qendra Kavaljon gjatë gjithë periudhës së kontratës. Pranimi do të bazohet në:

- a) përmbushjen e produkteve minimale të përcaktuara në këto Terma Reference;
- b) cilësinë dhe koherencën grafike të materialeve;
- c) respektimin e kalendarit të komunikimit dhe afateve të dakordësuara;
- d) publikimin dhe administrimin e materialeve sipas planit të miratuar;
- e) dorëzimin e statistikave dhe raporteve të performancës;
- f) dorëzimin e skedarëve finalë dhe të redaktueshëm, sipas rastit;
- g) korrigjimin e materialeve kur kjo kërkohet në mënyrë të arsyetuar nga Qendra Kavaljon.

Për materialet kryesore, Qendra Kavaljon mund të kërkojë miratim paraprak përpara publikimit. Pranimi përfundimtar do të kryhet pas dorëzimit të plotë të materialeve, skedarëve dhe raportit përfundimtar të fushatës.

13. VLERA E PARASHIKUAR

Vlera e parashikuar për realizimin e plotë të shërbimit është 250,000 (dyqind e pesëdhjetë mijë) lekë, sipas preventivit të projektit “Kavaja 365 Experience”. Kjo vlerë mbulon angazhimin profesional, dizajnin grafik, përgatitjen dhe përshtatjen e materialeve, administrimin e fushatës digjitale, monitorimin, raportimin dhe çdo kosto tjetër të nevojshme për realizimin e objektit të kontratës. Nëse përdoret promovim i sponsorizuar, kostoja e tij duhet të jetë brenda kësaj vlere dhe e dokumentuar sipas kërkesave të Qendrës Kavaljon.

14. KONFIDENCIALITETI DHE SJELLJA PROFESIONALE

Ofruesi duhet të ruajë konfidencialitetin e të dhënave, materialeve, fjalëkalimeve ose aksesit administrativ që mund t’i jepet për realizimin e shërbimit. Akseset në llogaritë e rrjeteve sociale përdoren vetëm për qëllimet e kontratës dhe duhet të menaxhohen në mënyrë të sigurt. Në përfundim të shërbimit, çdo akses i dhënë ofruesit do të hiqet ose rikthehet sipas udhëzimeve të Qendrës Kavaljon.

15. DISPOZITA PËRFUNDIMTARE

Këto Terma Reference përbëjnë bazën teknike për kërkimin dhe kontraktimin e shërbimit të dizajnit grafik, menaxhimit të fushatës digjitale dhe promovimit në rrjetet sociale në kuadër të projektit “Kavaja 365 Experience”. Çdo ndryshim i rëndësishëm në objektin, produktet, afatet ose mënyrën e realizimit të shërbimit duhet të miratohet paraprakisht nga Qendra Kavaljon dhe të jetë në përputhje me aktivitetet dhe buxhetin e projektit.

PËR QENDRËN KAVALJON
DREJTORI EKZEKUTIV
Bora Ristani

Firma: _____

Data: ____ / ____ / 2026